


涪陵圖書館存

鍾伯良贈

胡文忠公全集



胡文忠公遺集卷七十六

湘鄉曾國荃纂輯

永康何鳳丹重編

致曾滌生制軍

庚申六月二十一日

荆宜漢沔水災重大各處釐局沖去十餘處前擬官捐後接派民捐刻下尙須緩辦也丈之批牘言簡而當於情理無冗字閒句而意義精深殆如東坡批范滂講義也林翼批牘或比俗吏爲優以此上塵冰案殆如河伯之望洋又如子貢之言宮牆也去年多病冬月囑黃子山飭各房書吏雜鈔十本亦不過十存四五耳十本之中抄存二本作梅閣定偶有圈點辱承台命謹以就正有道臨發又增慙愧欲不寄去而又不可也

致閻丹初農部

六月二十一日

毛旭初若肯往返函商弟當告以愚慮第一要件要練馬兵四五千步兵一萬乃可保耳以不教民戰是爲棄之今日之說團者是也

致左季高京卿

六月二十二日

公入蜀則恐氣類孤而功不成此愚人之私意卽昇以蜀督而自薇柏以至州縣多爲小人官作亂於上民思亂於下吾恐丈之必不能堪也且未亂易治已亂易治而將亂難治其上下官吏異常放恣異常昏庸異常險詐蜀事是也舉劉入蜀是不得已之計近年天下督撫多半不能兵事亦且無處募勇方今 天眷西顧震

恐悚惶凡爲人臣宜如何籌謀盡善以答 君父之憂哉

致曾沅圃觀察

二十三營卽移營合圍此事是全院根本卽是謀吳根本安慶不得全局不振惟丈毅然行之至援賊之多寡他處之安危責在多李斷不致掣動安慶圍師也凱章十六日乃始從湘鄉起身而各路之乞兵於滌帥者甚切安慶對岸求丈乞兵於江西或可稍斷接濟是爲至要速與滌丈言之必祈早到否則北岸緊而南岸仍然偷漏無益也

致李香雪都轉

六月二十四日

沔陽密信紅沙廟豐口頭仍須修築然不講究根脚則不能踏實漩渦卽是脚虛之實證凡築牆造屋皆然作人作事亦無不然司馬公腳踏實地便是經天緯地之奇才排沙口築室道謀羣言淆亂莫得其衷可請密商方伯委實心虛心人前往密看仍須周覽博諮以盡其情左菱州之外尙有人否浙江之餉富於湖北現在軍中及官場受用之數舉劉入蜀此人才不如左而氣度較勝橫覽七十二州督撫藩臬竟少帶兵之人亦無門路可以募勇則舍此豫州牧固無人矣滌帥來函尙不滿意其惜之耶抑歛之耶我見似屬不錯大約石逆入蜀卽令以劉蕭二軍并力謀之尙須失陷大半如無此二軍則全局皆危不可收拾劉公早到挽回大半尙可望異日之增人以補救之天下皆須兵之地天下無帶兵之人是大可憂矣團練如何禦賊毛公率檄亦且東

手吳木齋一生立志天下無不可守之城麻城緊要可遂其志此地係北防正路麻城不失則黃岡漢陽之圍風陽邏巴河宋埠沙口均穩元宋之際此爲元兵入鄂州之路而必以先固麻城爲本則固近日北門第一關也

致嚴渭春方伯

徽帥月費三十萬之餉浙帥月費五十萬之餉問其兵則答曰六萬人三萬人也問其謀與其摺奏則人盡言爲吳孫彭韓矣乃急則求此不足萬人之曾滌帥且惱羞成怒也湖南各軍弟已羽檄交馳然非七月杪不能到防滌帥詢我以言已酌籌復之仍請集思益我我將以公謀告之滌帥而不攘爲我私也

致曾制軍

六月二十四日

安慶宜合圍經厚庵希庵雪琴三傑會議決策必有十分把握沅公已照辦林翼亦迭函請其毅然行之坦然無疑援賊之遲速多寡與他路之成敗利鈍安慶一軍儘可不問志專則神凝也其卷舒操縱必以水師爲根本可穩固無虞安慶對岸水師艇哨無可依泊沅公求江西二營助力防守以杜油鹽柴薪之接濟乞速籌之又坪慶言軍事林翼屬其舉國以從公指揮近狀何如官帥復奏左公督辦難期速效舉劉入蜀與鄱見同細思籌撫多半不能帶兵又無門徑可以募勇舍劉公別無可舉少荃帶勇多年中道自畫若一勁到底必有可觀兵事尙早毋卽厭苦也揚州水部都督亦須另籌陸師萬人以翼之是非不明節義不講此天下所以亂也

近因澹公撤卹頗致悲憤錄原奏及

旨求指示如何爭正之義及措詞進奏緩急之宜如可挈衡會奏庶

幾此心乃安

復金逸亭伍次蓀 六月二十五日

蘇州十三日寅刻失守張璧田十四日退至杭州可爲痛哭接次蓀二十一日手書領悉種切次蓀尙謂常州未失狗逆正在相持似不盡然春間我欲救吳越無人以爲然至今恐不能救不可救而又無能救矣秋冬之間必挾全力西犯謀楚旁擾橫軼以圖牽掣我師不可不預爲憂思準備如山內之兵應禦於境外則兵當在前擇霍六固始商城等處駐紮如應禦羅麻之間則恪守希庵先生遠剿近守之法兵力當注重於黃州之上或羅田松子關三四千人麻城大小界嶺三千人黃州三千人及是時閒暇以兵駐之該處未有新修礮樓卡關並無入守若以夏令派人守之逐日加修則勇丁不致自逸而工程完固防備益堅且無事時之勝著也鄙見如此未審孰當應請斟酌機宜迅卽示復爲企鄙見兵愈遠而力愈分懷桐是第一關鍵天堂是第二關鍵懷桐未復天堂不可無兵其地可以控制數州縣而又常有糧米可採也鄙意兵事以夸大矜張驚遠爲忌收斂固密切近爲貴霍山余軍應否撤回天堂以二千五百人或三千人爲守又以五百人或千人分守霍山西後五十里之土地嶺此隘關五百人可守然未親歷其境尙祈詳悉函復又有流波磴之觀音坎大尖門此處現已修關各派百人守之力必不足也似此布置只棄去霍山一城而天堂既有兵二千五百人其土地嶺觀

音坎大尖門羅田松子關麻城大小界嶺又分去八千人似山內已可有備而潯山太湖英山蘄州蘄水宿松可穩此計似較穩也或曰不如合力達剿然弟總不以爲妥請公同酌量審重計出萬全明以告我月前曾以此意隱約函致幹臣會亭亦不能深喻其意也

復曾制軍

天下人心更有挾夷以求寵利者是又孟子所不及料也林翼服作梅方而愈作梅爲我定計向晦不看公事不寫信初更上牀二更靠枕五更卽起服藥粥一碗行之甫三日頓覺精神大益總須師丈之有恆心乃敢自信其有效也本年春間將散營盡歸禮堂志在得統將者已三年矣幸得統將而不知留些散營亦有分撥之益禮與希均不肯撥兵與人昔年迪庵則專意撥兵與人其純忠在此其失機亦或因此大軍駐祁門賊所深憚張家灘暫可無妨乞酌之凱章四千人已到袁州浙中乞師俟次青李公凱章到齊再酌大致須萬人出浙江萬人出揚州又二萬餘人謀皖南三萬人謀皖北然後丈之大勳可集鄂中竟無力解浙餉部文言解到浙江以供丈用鄂中應改爲解到丈處以供東征之用耳

致曾觀察

二十二日將關內關外各營槩行逼近直至車經渡而止此軍舒卷操縱府庫倉廩均以水師爲根本故前濠後濠安慶宜之他處尙不盡然也林翼在太平架李忠武在洪山預議後濠乃各於後面十餘里興工其時惟

邢星槎遵依靠實辦理人固笑其拙也石逆到後則後濠變爲前濠人又嘆其巧此議本出於李忠武林翼至今思之有餘情焉

復楊厚庵軍門

六月二十六日

安慶合圍之事經韓范諸公謀之同心同力成此美舉必能計出萬全弟前復沅圃先生書已極力贊成矣承示沅部深溝高壘堅守不戰卽援賊竄至可恃無恐惟東門外須添營扼截直抵江岸則圍師接濟可由大江運送城賊糧終有時而盡可望成功仰見碩畫老謀算無遺策至迎剿援賊希庵當可獨任其難不至抽調圍師也

復余會亭

六月二十七日

足下擬俟硃卡落成以二營駐於霍南之三石嶺白沙嶺一帶以一營屏於六萬寨之前以二營駐於霍西之樂兒嶺後路爲大尖門觀音坎各處策應之師所擬大槩各情有不得不分之勢而鄙意仍嫌其分而力單處處有備轉恐處處無備仍須隨時斟酌惟聯絡前路舒六水旱各團囑其穩守自固切勿出戰專刦賊後之糧并以虛聲夜襲使賊驚疑斷不可於日間浪戰并令各處槩將新收之稻入寨入圍的是切要之事蓋清野則賊無所掠堅壁則民乃有所恃而不恐古今平賊之略不出於此可隨時董勸激厲之敝處并允察核尤爲出力耆代爲奏獎以作士氣而固民心

復舒都護 六月三十日

承祧乃閣下家事無可代謀俟功成後自有調處之方目前聽之而已弟與兄同心同力相期共濟時艱前將尊函附寄省中以扣分爲大眾公議所關恐累閣下聲名所需公費弟已飭糧臺另籌此事應請嚴切禁止閣下雖無近利之心誠恐爲人所誤人之多言亦可畏也兵弁聚處營盤無故不準擅離軍法自蕭馬隊占住民房無惡不作深堪痛恨其有攜帶文人同行者尤爲不成事體大千軍令種種不法閣下既有所聞亟應從嚴參革萬勿徇縱至切至禱

復金觀察 七月初一日

得信知尊夫人殉節十年化石一旦完貞義烈千秋流芳不替可以愧今之宮太保督三江而下賤無恥不堪爲尊門作奴婢矣老兄之門有烈女老兄亦且不朽其勉力自愛講究兵事以紓國難而報家仇毋過戚戚

復曾制軍 七月初三日

手教具悉一切東流湘後營應候厚庵酌調建德寶右營獨防張家灘之賊亦恐孤力不如檄寶營他起防張家灘而分其勢卽以寶右營移安慶對岸爲妥賊勢賊情殆以上游堅城堅壘作守局而於吳越地方蠶食殆徧儼宣城不守則進兵之路阻遏不前旣孤來蘇之望亦非軍機之宜宋國承鄭陽和楊鎮魁等可先救甯國則吳越之賊必有所返顧而不能逞廣德一帶軍威旣振則杭州亦可幸存

時周天受尙守甯國府

致各牧令

頃接彭守禹門來函據稱蘄州東路邊界與廣濟接壤之柳樹山等處有不法之徒煽惑愚民習教之事並有大冶縣教匪逃往該處被其勾結約會定期聚眾滋事等語民之訛言懞莫之懲現有便道回省駐防勇丁千餘名密飭吳倅幹臣由蘄州驛路並巴河一帶沿途查辦應請足下會商彭守相機而行訪查實在情形速即稟覆實爲至要

復李少荃觀察

七月初六日

鹽務不難在本剛正不撓之節而出以條理精密之才堅持不搖如放棹中流只須三五番風浪卽穩渡矣東南諸公衮衮登場以我視之均有嗜欲而無性氣聞公之風將始疑之中謗之繼且畏之求之望公憐之矣與若輩同事只賴此不患得患失之心耳然與患得患失之人同處非如公之強固不易自立也

致官揆帥

七月初六日

前任黃州府金菊仙先生於咸豐三年粵匪復竄楚北殉難黃州其妻女眷屬先於二年鄂省被陷時亦俱殉節閭門忠義大節凜然洵堪矜憫查金故守在楚所至之處廉正愛民其治績優異年來無此好官忠節之槩賢良之治實令人追感不已身歿之後不名一錢茲其胞姪鵬程廣文赴鄂扶柩歸里長途跋涉資斧艱難其家只寡媳幼孫尚在休甯也應請中堂俯念該守爲鄂省第一賢良爲國捐軀一門全節與渭春義渠伯符

諸君子通商籌度俾其忠骨五棺早歸不致久淪異地以昭激勸而慰忠魂是所至感附上該故守行狀並乞賜覽林翼向不識菊仙先生而每聞其德政品節欽佩萬分如蒙中堂仁人優厚忠良林翼願以二百金增入贖軍之後七月歸款寄交省中並以附聞

致韓南溪觀察

七月初八日

左公入蜀蜀重入吳吳重然合則兩利分恐兩傷情不能合也弟之舉劉入蜀爲蜀謀應如此田忠普特營官哨長才耳湘人保之太過黔人爭之太力以致樞廷以爲異人實則此等勇士近年所在皆有以言將略將才則未也終恐誤黔并必誤楚

復多禮堂都統

七月初八日

奉到惠函具悉一切惟攻堅非至謀扒城尤非善策驅血肉之軀與礮石相抗精銳徒傷士氣不振卽如老兄目前攻二壘帶傷及不列等不報者約千餘人若再以梯攻城不知又傷多少數百年無扒城得城之事惟賊亂賊遁乃有扒城而入者卽古史所載戰事亦然應請老兄審察賊情別籌良策扒城之議決不可行偵探一節尙希留意實爲至要希庵來書老兄勤勞太過尙祈節勞自重爲囑

復荊州府唐蔭雲

七月初八日

蘆花餘蔭不分畛域嚴密查拏所辦甚妥不必飭知潛江各處門丁劉海珊及舒李等攆逐爲是差蠹徐順及

全得升等應飭汪令迅卽起解居今日而圖治總以痛掃書差積弊爲先著非用吾霹靂手段不能顯菩薩心腸迫法立知恩而賢太守之功德遠矣

復李少荃觀察鴻章七月初十日

今春論和春奏定三向榮均是用違其才又極論田興恕之不可大用劉富成一夫之勇不可爲大將左公謂我刻殆因此也歷年江南人論兵將均極寬宏仁恕掩覆過失羈縻勿絕而已實因其人志氣不能自爲不知兵事故於兵將多恕詞又其識見不屑爲兵將故於兵將多鄙詞以爲戰陣之事非此輩不可不知兵事爲儒學之至精非尋常士流所能幾及也

復舒輔廷副都統七月初十日

奉到惠函具悉清恙未痛尊體大不如前系念綦切惟時局艱難正聖主憂勤之日非臣子退閒之時老兄德性忠純軍心感戴正須加意調攝力保危疆以繫衆望去之一字微論義不可言卽以病狀上聞亦未必邀恩準也弟羸軀久病精力已十分頽廢而時艱勢危亦不敢不免竭其愚尚望餐衛榮調艱難共濟是則私心之所切禱耳至令弟岳公之事彼自不肖非老兄之過弟義應直言兄已懲辦卽是大公無私此等事不必留在心中不可因此而積鬱在心天下情形日見艱難弟與兄惟有盡心竭誠力所能及者勉力爲之而已此後弟兄同命始終并無二心尙祈鑒之諒之

後會沉園觀察

竇仙信二件均到所論自正大此公宜助滌帥滌丈任重事煩東至於海南至嶺外北及齊魯滕薛之交其西則及蘄黃并長沙本郡所屬之壤土矣非才不濟全視乎人才多寡以定興衰公亦須力函懇之求才當如白圭治生之法不得止公其助力代求之

致六安州鄒季棠 七月十一日

翁中丞來函已調慮又熊他處而派吉鎮來大安吉鎮何人所帶爲兵爲勇虛實強弱之數何如應請審示六安地衝要非強兵萬餘難以應敵若州城有水可恃則次等兵勇布置守禦不缺鹽米火藥亦可守而不失如古鎮有志城守切祈早爲籌度以據城堅守爲主俟賊來時小股則相機鵬剿大股則堅忍不出以挫其鋒嚴飭地方堅壁清野以挫賊勢而伐賊謀城不可得野無所掠賊必不假途六安矣

復曾制軍 七月十二日

天下惟左右近習不可不慎左右近習無正人卽良友直言亦不能進也危乎微乎宮中府中之事大抵以此爲消長否泰之關昔年在黔與黃心齋魏將侯縱談凡官自督撫司道至於牧令均應歲奉千餘金或數百金敦請道德忠鯁之儒以爲師友匡正其心思增益其耳目知慮之所不及必如是而後德可修名可保也黃公魏公均聽其言祖庚寄耳目於撫標弁兵寄爪牙於盧袁寄心腹於楊恩絨未有不潰敗決裂者近年頗舉此

義以戒鄂中友朋質之高明以爲何如甯國是進兵之路此機不失秋冬戰功必有偉績不僅有益於浙江之
兵事兼可大慰朝野之人心此地不守則處處爲堅城堅壘所阻功效稍遲耳皖南吏治必以佳者來助善守
竟者守於竟外林翼早知此義矣近事非從吏治人心痛下工夫滌腸盪胃必難挽回斯言也其平吳之第一
功乎丈已得其綱領游夏不復贊詞

復監利縣唐鶴九

七月十三日

足下以士行之勤敏行李冰之事業循良作用知與庸吏不同隄工堅實落成監民百世之利也慰甚齋匪坊
匪亟應確訪嚴防惟足下曉諭士民切實訓練是所至企

復閩丹初農部

七月十四日

治軍以整綱紀爲先務而不在小費舒營弟嚴行函致革去各官頃得舒公函咨可感可敬此公忠良惟惜少
欠精明耳然果精明又恐未必如此之忠良幸以公費優待之責人以嚴不能不養人以寬也

復顏相廷軍門

七月十五日

奉到惠函并抄示襄陽士民公稟敬承一切驥公德政在民襄人愛之如嬰兒之戀慈母可感可敬襄陽近年
以來全恃公與驥公作長城之倚賴羊叔子杜武庫不得專美於前矣惟皖省上游須有大員駐紮前因驥公
遷擢皖臬業經揆帥奏留楚軍就近辦理於民事吏事均有裨益已奉 恩旨俞允矣

致襄陽府啟 七月十五日

設險守國古有常經先事預防軍之善政濬濠修壘諸事亟應集費咸成力求實濟得曠雲廉訪來函據稱樊城濠工現飭陶營官督率勇丁接辦並另雇工匠估造碣樓其濱臨襄河不能建碣之處修砌牛馬牆彌縫其闕至老河口毗連豫省市塵繁富爲撿逆之所垂涎自應一律照辦查樊城商民多懷觀望房租捐輸款項日久未經取齊爲該商民自衛資本自保性命尙不領悟可謂至愚應請閣下嚴切曉諭趕緊興修並嚴行勒限堅實落成爲要

復郭筠仙太史書

滌公季公均憂危疑畏丈獨居承明之廬亦不可久退歸義也天下大事惟有德者勝之丈欲徇小廉而不急救大難不知丈之所在益人家國不可數計又何嫌乎林翼才力薄弱近年病久滌公季公均爲憂之魚勞則賴尾鶴孤則悲鳴亦丈之所心閱也求於秋冬之交至英山一會懸榻以待擁篲而迎林翼一息尙存非師保護持傳教之不可成立尙乞鑑亮壽山調入滌帥營中使之依滌依季可申其志季公得林翼與滌丈左右輔翼必成大功獨入蜀中非所宜也政府不可與爭疆吏亦不宜多言外事丈旨精微敬存不忘

復荊州府唐蔭雲 七月十九日

時事之壞壞於人心澆薄人心如此天意不卜可知匪黨連結滋事亟應嚴密查拏常遭隔省之處不必行文

行之無益各處官吏苦無實心辦事之人狃目前之安而釀異日之巨禍盜賊充斥職此之由承示委員察訪辦理極爲妥善另札出境查拏惟閣下相機行之可耳抽釐助餉知我罪我皆所不辭而此一片救人之苦心要可以對蚩蚩之氓而無愧沙市各局紳弟非謂其不好特錢本不好奈何使非破除俗見妥立章程餉錢滯礙難行徒以遂市僧侵漁之計耳

致李希庵方伯

七月十九日

駱公來函索求朱品文劉重槐于高勝之營斷難應允劉重槐久隨麾下尙可練成大器近人均誤於討便宜享現成之福不知兵將非苦求苦索自選自募雖有亦不得力也夫精兵良將亦須運用得法乃能有成近人因朝命言及湖北卽專意向湖北派兵湖北何能以一省供應各省哉 天子之命殆如父母之心見不肖子破家必令勤苦子分與以財在 天心則至仁而大公也其如子孫之力不及何

致曾沅園觀察

七月十九日

奉手教所見遠大卽如尊直治將亂之國用重典治久亂之地宜予生路尤爲卓越不刊之論

致李香雪都轉

七月二十日

天下治則輕小事重大事天下亂則重小事輕大事商政之季年苛察而周政則只言所重民食喪祭秦政苛刻而漢政約法三章弟昨以所重命題卽此意也

致嚴方伯 七月二十日

勘災徵糧核實爲重我輩所爲何事不爲民生起見豈爲富貴自封如盜賊攫金之志哉我兄言做大官須從百姓做起知此則知稼穡之艱難民之情僞矣今某官至以筆墨欺飾眞文字轉瀾之頽風也諛詞害政害事

致官揆帥 七月二十二日

聞尊體日漸復元應健脾胃爲主脾胃者人之元氣也潛山天柱漢代尊爲南嶽漢武巡狩由盛唐至潛登天柱泛舟樅陽射蛟潯陽江中卽其地萬山縱橫獨產天堂野朮土人以繩縛腰別繫繩樹石間跳身絕壑懸巖間以采之惜所得不多弟服之大效其和平中正如老兄性格付上一匣計野朮三十五枝如試服有效秋冬更可購覓奉上

復島口釐局但少村湘良 七月二十二日

釐務無苛無縱辦法自得其平另示錢漕一節立法初新陋規徐起自應嚴札查辦細思此事亦因散戶之不急輸將使包戶得乘縣令之急而抵其隙至包戶納賄則包戶有權而窮民受害已函致藩臺密札訪查必須澈底根究也

復宋雪颿工部 七月二十六日